



Caderno da crítica

Cuestionario Proust: Iria Collazo López

[Ramón Nicolás 7 Outubro 2015](#)

1.– Principal trazo do seu carácter?

-A ansiedade, a obsesión, a compulsión.

2.– Que calidade aprecia máis nas persoas?

-A empatía e a bondade.

3.– Que agarda das súas amizades?

-Lealdade, comprensión.

4.– A súa principal eiva?

-A enfermidade que me enferruxa os ósos e o cerebro.

5.– A súa ocupación favorita?

-Pensar sobre o que escribo, o que escribín, o que me gustaría chegar a escribir.

6.– O seu ideal de felicidade?

-Conducir nun día solleiro coa música e o vento asubiándome nos oídos, sentindo que as persoas que amo tamén me aman a min.

7.– Cal sería a súa maior desgraza?

-A despersonalización sen cura.

8.– Que lle gustaría ser?

-O que son.

9.– En que país desexaría vivir?

-Nun onde estivesen as persoas que quero. E, só por un día, no reino de Fantasía.

10.– A súa cor favorita?

-Violeta, en todos os seus matices e significacións.

11. – A flor que máis lle gusta?

-As que rompen ao arrincalas porque non queren ser de ninguén máis ca de si mesmas, sobre todo as das maceiras e as cerdeiras.

12.– O paxaro que prefire?

-A curuxa.

13.– A súa devoción na prosa?

-A devoción implica para min un aquel de submisión que non me gusta, pero admiro a moitas e moitos, entre xs que ten un lugar especial o mestre Saramago.

14.– E na poesía?

-Apaixóname Manoel Antonio.

15.– Un libro?

-Un só non, por favor. Moitos.

16.– Un heroe de ficción?

-Tintín.

17.– Unha heroína?

-Mafalda.

18.– A súa música favorita?

-A música rock dos 80 e 90 (Dire Straits, Aerosmith, Queen, Rage Against the Machine, Green Day, Scorpions, Gun's & Roses, Nirvana, Bon Jovi); a folk (Matto Congrio, Berrogüetto, Carlos Núñez, Mercedes Peón, Budiño, Luar na Lubre...); e tamén Zaz, Nina Simone, Silvio, Sés, Calle 13, Vetusta Morla... En fin, creo que era máis sinxelo dicir a que non me gusta: a pachanga repetitiva e as reversións bacaladeras que afogan bos temas.

19.– Na pintura?

-Frida Khalo, Klimt, Munch, Dalí.

20.– Un heroe ou heroína na vida real?

-Miña nai.

21.– O seu nome favorito?

-Niara.

22.– Que hábito alleo non soporta?

-A crítica desapiadada derivada da envexa.

23.– O que máis odia?

-O maltrato aos seres indefensos.

24.– A figura histórica que máis despreza?

-Creo que o de figura histórica molaríalle demasiado e el non chegaría nin a espantallo, pero direi Hitler.

25.– Un feito militar que admire?

-A Revolución dos Cravos.

26.– Que don natural lle gustaría ter?

-Cantar marabillosamente ben.

27. – De que maneira lle gustaría morrer?

-Coa conciencia tranquila, sen manchar moito e sen molestar.

28.– Cal é o seu estado de ánimo máis habitual?

-Esperando.

29.– Que defectos lle inspiran máis indulxencia?

-Os derivados da impulsividade e a inxenuidade.

30.– Un lema na súa vida?

-Lémbrete de respirar.